

快

園

詩

話

快園詩話卷九

江寧 凌霄 芝泉

鐵嶺百菊溪節相齡和余春柳詞曰陰晴天氣散餘薰
垂柳垂楊萬緒紛開眼東風過二月畫眉春色到三分
瓊瓏朱戶遮花影漱澹青溪蘸水紋誰唱陽關腸斷曲
玉簫聲裏憶夫君紅杏邨頭白板橋天涯回首碧條條
社前社後風初翦江北江南雪正消倩影短長愁欲綰
離情深淺暗相撩可憐鎮日眠仍起懶傍花叢門舞腰
朝含宿雨暮含烟水郭山邨斷復連縷弱那禁棲翠鳥
陰濃還解覆紅船門前繫馬知何日樓上凝粧又一年

忽漫飄風花似雪玉人衣冷欲裝絲搖落江潭莫更悲
依依重見雁來時渡頭波暖迎桃葉陌上花開唱柳枝
一樣似人看自惜幾回逢月約偏遲牧之老去風情減
禪榻香銷感鬢絲公子札拉芬生余賀之詩公擇句書
聯曰福地種寬欣得玉軍門歲滿慶提戈

泗州陳雨峯總鎮階平以游琅山詩見寄余依韻和之
并書聯贈之曰緩帶輕裘羊叔子垂紳正笏郭汾陽
長白鰲滄來觀察圖有句曰厨奴不自慚偷米道我春
來飯量加

昌樂閭綵園觀察學淳梅花嶺史公墓句曰天留香土

葬衣冠

山東王簣山觀察賡言主持風雅愛士耽詩人比之淮海龍門贈余詩曰散金真似散天花倚馬高才世共誇可惜兩年官白下未曾一訪子雲家友誼師恩鎮不忘贈題佳句已盈箱新詩好共梅花讀一字吟來一字香

時由江南糧儲移任常鎮

眞州汪劒潭太守端光篤於愛才甘於說士今二子皆捷竹素已貴爲方伯矣書爲時重詞尤獨步昔與余唱和甚多惜皆遺忘今僅記其詩家句曰薄葬無棺輕到紙新埋有骨重於人湖上納涼曰佛開運世界天縱水

心情湖上觀荷曰美人本以蓮爲性君子偏從水間交
舉之聊見一斑

錢唐陳雲伯明府文述善久交無宿諾余十餘年前陳
曼生司馬招游吳門時所舊識也余養病邗上適公宰
江都政聲大著民爲之歌曰德政歌歌聲新聽我歌紀
陳公仁有時四境多疫癘公乃散藥還祈神分俸義全
宦家女捐廉屢濟寒儒貧誰如我陳公仁德政歌歌聲
奇聽我歌紀陳公慈公之愛民如保赤示辱幾欲蒲鞭
施杖刑本因酷熱減公於寒凍亦如之誰如我陳公慈
德政歌歌聲盈聽我歌紀陳公清公來宰此繁華地只

飲邗江水一罌富貴無理不可恃萬金難買一分情誰
如我陳公清德政歌歌聲純聽我歌紀陳公神公之治
歎萬人覩強者帖服杜者伸秋毫隱處亦能察百里之
內無奸民誰如我陳公神余聞歌乃書聯贈之曰明鏡
高懸其仰二分邗上月惠聲廣播如聽萬頃浙江濤
錢塘陳小雲司馬裴之雲伯明府公子也其才筆風華
典贍清新俊逸酷肖其父見其七古甚多篇長不及備
載今見其消夏詞中句曰消受白蓮花外雨蜻蜓紅颺
釣絲風食卷疏簾延暝色水蟲如雨撲秋鐙滿地綠陰
清似水亂蟬風裡逗秋聲

興化余葵庵太守溶敦厚樸實藹然可親爲余書扇曰
風都有意收殘雨雲尙多情戀太陽莫怪人間無易事
一晴天且費商量

仁和汪月樵鹽尹之選風雅愛才人方之王漁洋尙書
贈余詩卷甚多皆爲愛者攜去僅記其平山看桂曰茶
味淡留客桂香濃襲衣遣懷日到門無熱客滿眼有寒
花梅鐙曰美人一笑相逢處月下何如鐙下明春風曰
幾番好信催梅萼一種柔情託柳條送春日記得來時
先有信欲尋歸路總無憑湖上觀荷曰竹影淨搖初日
薄花香涼壓一湖平

丹徒周實夫廣文耿光慷慨愛友有句曰深徑連朝斷
客蹤小亭青受隔江峯雨多溪水秋猶漲風緊檐霜曉
尙濃偶被新寒開酒戒每因離思悔情鍾初晴恰與游
行便好負詩囊策短筇

白坦庵鹽尹守清名宦白總戎雲上公子也情深愛士
工吟而不多見曾於江素山扇頭見其一詩曰溪雲纔
散雨初晴遠近樵擔盡入城一簇筠籃籠絡緯野人肩
上賣秋聲

新安吳才甫外翰榕古道君子也工畫而不可易作工
詩而不喜多吟僅錄其小詩龔賞梅有句曰巡檐定有

花能笑種樹應如我最閒
小院鴉鋤常在手
昨宵蟾魄正當頭

江都黃春谷大令承吉余二十年前鄉試時交也才品
高超友誼篤厚以解元聯捷宦游於外僅記其題余感
舊圖詩曰昔從金陵游快園主人愛我情無已荷花香
裡賦新詩竹箭東南一時美於今荏苒十三年異地重
逢亦夙緣示我新圖無限意臨風展卷憶嬋娟
袁真來世弟遲其性情才筆儼如簡齋師官真州時遭
子志鈺往謁真來撫字之備至余書聯贈之曰官政美
因家學富師恩重繼友情濃

太平李雲章河尹貢三豁達不羈咏瓦松曰不愁梁棟
居無地深感中堂寄有恩重陽雨曰頭緣帽落剛尋笠
身便蓑穿不畏秋返魂梅曰風情未了生前夢魂魄還
依去後身贈袁真來曰恩威並濟心如水寬猛能兼面
帶霜

上元李文起太守師韓余姑丈也與卞芝軒大令枋集
快園同咏木瓜李曰每思香澤曾探袖轉覺嫌疑在正
冠卞曰守株寒士金偏富窺戶秋娘粉又調余曰角枕
如蘭留並蒂藥囊比艾畜三年

梁湘屏鹽尹承綸階平相國公子也送余詩曰幕府曾

傾國士風襄鄖往事記從戎早年傳誦元才子到處逢
迎陳孟公詩卷每因題句益橐裝多爲愛名空留看明
月纔三五又指江雲鵲首東

如臯石蕙佩刺史珩工詩善書敦厚誠篤贈余聯曰風
騷骨帶三分俠湖海人欽八斗才余轉贈之曰詩堪作
史唐工部書到通神晉右軍

段鶴臺州判玉立贈余詩曰寄言凌子善調身莫念今
爲競渡辰此日江潭弔漁父千秋詞藻屬騷人客逢佳
節須持酒天忌高才不但貧幸有知交相唱和轉醫老
病益精神余書聯報之曰老去誦經心有佛狂來縱酒

目無人

洪賓華殿撰瑩余二十年前鄉試時交也洪赴試時賃屋較遲余代托孫淵如假於上邑吳宰得王氏水榭復爲江邑宰奪去時已給租值五十金矣孫將追還之洪曰彼已窘於邑宰矣贈之可也熊柱卿贊府贈洪句曰未元先積福應比讀書佳後果狀元及第

甘泉許春卿茂才之翰亦余二十餘年交也其人和似春風其才清於秋水卷中載其佳句甚多今又見其嘗酒句云染指每從開甕始沾唇多在速賓先春風句曰欲振羽翰期燕子先傳消息到梅花

曙開上人揚州柳蔭庵高僧也工詩善醫愛才好義吳
穀人祭酒曾贈之聯曰拯除疾苦推仙手周濟貧寒仗
佛心

徐晴圃廉訪所官河庫道時與余同飲於清江贊化宮
徐於筵間歌陽關一曲屬余以詩和之余詩曰歲歲舟
車賦遠征驪歌淒斷別時情客中又聽陽關曲勸我羈
人何處行

譙味堂廣文配道以孝廉舉孝廉方正工醫愛友有句
曰小窗面面紙層層霜氣今宵到未曾愛放梅花香透
入輕風幾度滅銀鐙上元人任旌德

桃源袁大令潔耽風雅重交游記其咏古人二詩西楚
項王曰拔山蓋世枉英雄垓下長歌霸氣終頻喚柰何
雖不逝羞顏無復返江東梁武帝曰曾捨金錢濟衆生
豈期絕粒向臺城雲光能致天花雨不救衰年荷荷聲
二詩別有深意

傅柳橋河尹祖緒瀟灑耽詩敦厚好友有句曰暖風吹
透小窗紗陣陣新蟲入似沙正是清明好天氣楊花飛
過又蘆花

卞芝軒孝廉句曰謁貴刺如投水石番番有去竟無來
此言必有慨而發近多謙謙君子未盡然也管健庵明

經句曰不是貴人無禮數未曾得見那能知阻隔之病
蓋有之矣

余抱病寓邗自丁丑至壬午六年承朋友解衣推食者
四方最多而同城則以陳雲伯明府汪劒潭太守汪月
樵齋尹許春卿茂才曙開上人寇坦之守尉白坦庵鹽
尹吳才甫外翰黃春谷大令數君爲最數君者皆一時
之名賢也故秦蕙坪通奉贈余詩曰莫歎肢殘每黯然
聲華難得似君全著書轉賴三年病取友能交一國賢
駿骨燕臺原至寶

石蕙佩刺耀州汪玉屏
幕襄陽皆來贈詩文

豬肝安邑是

廉泉

陳雲伯宰江都按月分
俸見贈并代償逋欠

及身事事皆佳話久信斯

人後世傳

余生於富家長游幕府數十年夢夢也及因病而貧因貧而困始知人情可感物力維艱因有句曰豪時那覺千金貴飢後方知一飯恩

熊介之觀察方受工詩愛才主安定講席時贈余詩曰快園詩話古文詞藉甚聲名海內知散盡黃金添白髮英雄才子下場時我亦身騎戰馬來祇今設帳大江隈性情迂緩成樗散明月當頭夜舉杯

余每思袁簡齋太史師千金買盡迎門笑一病方知結髮恩之句意味深長又記師家曾畜羊逸入鄰園食菜

鄰來告師師曰鄰知園字乎必築圍而後可鄰對曰公亦知園字乎築圍僅防外人不能止公家入也聞者絕倒

如臯鄭窳濱副車韶風雅愛友其老將句曰有志不妨終馬革餘年尙未減牛餐自題詩草曰愧無才士八叉手敢比良醫三折肱楊花曰張緒風流何晏粉莫將冷落比蘆花車中遇雨曰在舟畏風波在車畏雨露須知行路難豈但公無渡

快園詩話卷十

江寧 凌 霄 芝泉

黃秋谷至馥字郁亭歛之業離於揚者耽吟咏重交游
風雅謙和無豪華習余二十年前與張老蘊王柳邨李
旭齋諸君唱和友也近聞傳誦其登北固山句曰山經
雲掩都成海浪挾風飛欲上天

陳穆堂逢衡揚之藏書家首屈一指有琴名小春雷亦
希世珍也性雅好客聞其秋眺句曰秋林密似春原草
遠水高過近郭山

海州黃退山進業長相思曰日夕憶君君不歸等閒顏

色鏡中老柳眼曰可能看得春愁破不向東風管別離
冬夜曰香怕有烟衾怕冷薰籠開闔兩俱難

江都張篠坡清漣對月句曰不怪旣圓偏又缺獨憐圓
少缺時多寄懷曰秋水一灣橋幾折攜琴何日踏歌來
月下曰今夜月明千里其不知月果爲誰圓

甘泉陳小書德樟書農茂才子也年十五時有句曰海
浪乘風立江帆帶雨飛文思清於水詩情淡似秋入簾
花氣濃於酒隔院柳棉飛上衣

江都蕭晴岩炳清高敦篤信義過人咏樵曰閒雲滿空
山流水下古渡流水與閒雲不知樵去路客舟曰歷來

寒暑心難繫見慣風波夢不驚勝地欲留風轉駛好山
初泊雨將晴

真州咏雪張少蓮曰徧栽瑤草神仙境重壓茅檐處士
家金鑪鬪酒寧無處葛帔當風亦有人汪綠楚曰鎮曰
圍鑪休笑我當時送炭是何人豈無蓬華號寒怨誰報
倉箱預兆恩劉雨亭曰雲因太冷難爲雨水到將枯尙
作花何物不能消俗態此中也合帶春痕程玉如曰感
我梅花和爾嚼勝他乳竇帶雲烹清白且因時著迹光
華豈藉月留痕邱白人曰詩酒且爲高士計羊羔豈合
大賢烹淡交到底終無俗白戰憑空不著痕志鉦曰雖

非雨露潤衡門報玖投瓊也是恩念到人行衣少絮記
曾鴻過爪留痕清寒骨自晶瑩在飄落名常潔白存春
意未來先美麗粉粧玉琢大乾坤

余與眞州吟侶結神交社劉雨亭寄余曰接得吟箋照
膽寒多才千古說方干庭前雪色瑩瑩白好與君詩一
例看余荅之曰記得軍中羽檄馳奔疲驥足半因詩而
今遙結神交社風雅依然似往時寄鈺曰一冬客裡寄
行蹤莫爲聯吟興太濃記取催歸書喚汝揚州臘月十
三封

眞州劉雨亭沛生字外穠工醫善書並頭蓮曰他日成

房秋露裡不知結子是誰多

眞州金可亭標慷慨好友工醫善書偶成曰交情欲久
須從淡詩句求新屢欠工秋感曰年年黃葉飄零日是
我山齋臥病時送鈺曰折柳蟬吟秋水岸買舟人渡夕
陽天

眞州王秋水澄才筆清健旅次留別曰小駐月餘日青
霜滿碧天花開時有蝶秋老不聞蟬興到攤書史歌成
雜管絃來朝挂帆去相見又何年扁豆花曰秋雨濕秋
籬秋風屋角欲有根嗟寸土結實愛雙歧簾倩孤松附
香應冷蝶知何人種紅豆遺恨惹相思寄衣曲曰停鍼

偷把淚痕彈滴上征衣漬未乾寄語檀郎須護惜莫教
痕跡被人看秋山句曰孤猿悲月咽清夜野鼠驚人窺
古松君母戴孺人閨秀也有句曰愁緒多如繭緒長漫
將心思自相商停鍼欲問庭前月露冷宵沈夜正涼絲
絲小雨濕疏桐貧病何緣勢兩窮理罷繡簾課兒讀半
間茅屋一燈紅

真州劉漱石漆訪友曰獨步探幽徑蕭然滿綠陰院圍
修竹官門掩落花深鳥語亂禪室鐘聲飛遠林故人尋
未見斜日已沉沉蓼花句曰秋色豔分江漢路夕陽紅
到水雲鄉

程古稀守愚攝山道中曰馳驅野徑晚春晴新沐峯巒
迭送迎草可攝生山得姓霞來棲止寺因名牛羊日落
爭歸路松栢風翻作雨聲指點興夫行莫倦白雲深處
是柴荆

汪問樵基福字受堂雪美人曰明月修容好春風識面
稀鷗曰不妨親近皆吾友最好浮沉順世情鰕曰有客
獨盲須爾目爲誰頻折笑君腰丈菊曰愧居籬落頭難
下怕近塵囂立必高

方應輶震赴試南閩余止而觴之方詩曰湖水盪湖烟
湖光八月天望中全畫境座上總神仙清酒如淮滿高

城接斗懸千秋月泉社一例藉詩傳飲少輒先醉茲游
未可忘六朝人已渺一片水餘香鷗鷺情同切煙波興
倍長嘉賓與賢主韻事播詞場

余客楚時寄兄健鵬司馬雲曰遇事悲雞肋驚心感雁
行官卑兄乞米客遠弟空囊冷落東山月

時兄署
郟城令飄零

漢水霜何時聯大被翦燭話中腸弟蘭谿別駕需赴衡
工時余送之曰同步嫌舟近頻看恐日沉萬端離別感
卅載弟兄心自愛互相屬魂銷雨不禁雖然千里隔來
往願佳音兄子志堯姪官山陰余寄詩曰天涯一樣繫
征纜我客邗江汝浙江暮汐晨潮來往便鯉魚休惜寄

雙雙

吾里王蜀江錦沅有句曰花蕊繽紛禽羽翬萬般心事
春愁擁欲將紅豆賺風流又虞灑作相思種

袁墨溪俊隱石城山下賣麪筋爲藥有句曰偶窺月上
疑窗曉纔夢梅回覺枕香又曰杜門本是舊寒儒又被
飢驅上道途予乏師資因廢學天將貧苦逼人慙韋布
何從讀五車公卿累代享榮華豈因陋室無才子膏火
原輸富貴家

快園銷寒每冬九譙翁柳邨寒鴉曰因風團作陣見月
嬾于飛孫淵如寒衾曰足如投水怯身擬臥冰涼俞種

芙蓉春日衣多勤欲汗地凍震疑鬆張香岩寒機日忍
寒雙足怯借煖一身搖

又燕山南閉戶日殘梅是我曾斜插古墨經誰卻倒磨
崔筠谷曝背日獻覺野人愚可笑搔希高士快何如吳
孝侯餽窗日添來虛室三分白關住薰鑪一縷香蔡芷
衫炙硯日可能光燄臨文吐易使雲烟觸紙生李瘦人
插梅日聘取美人勞護惜安排高士費工夫方子雲補
裘日棄置三時雖冷落披來百結也溫柔曹澹泉袖手
日詩成腹稿教兒寫琴試絃音累客彈多少世間閑冷
事不妨局外作旁觀

朱春岩蘭余姊丈也愛其采菱曲曰菱實甘郎口菱尖
刺儂手刺手儂不覺但問郎甘否

陶子岑文本余髫年交江南藏書第一家也所居阮懷
寧宅園有阮姬人墓余與何允軒銓梁松坪增厚同咏
詩余有句日眉顰新月餘溪柳笑啟春風倩野花今四
十餘年矣

揚之同社余多服膺已過者張老蘊之工夫汪元波之
韻致胡丙臯之高超李漁莊之流麗現在者黃小平之
雄健汪桂庵之細膩汪稚泉之格律汪泳泉之工整江
南厓之豪爽江少泉之駘蕩周在東之俊逸周樂夫之

清新程半人之敏捷江鄭堂之博雅李琴軒之摹情談
蓉庵之體物汪筠溪之老當程書之之性靈王鶴汀之
銳志谷歙林之深思惜皆忘其詩先誌其筆路俟錄得
再當續入

陳生達字尊三號穎叔性好善從余學詩畫夢龍與牛
交而畫大進每畫必題有題畫詩一百首行世其女兒
紅萊蔔詩曰小名喚出豔於花宛轉真如未破瓜不用
胭脂染顏色生來紅透守宮砂

韓生淦字劍泉有虹橋鐙船歌句曰十萬流螢燄不飛
二分明月光全讓

汪生照字筱漁禹廟塑壁曰似得沈沙鼎如登載鬼車
玉勾斜日子夜青燐吹不散猶疑螢苑舊風流

解勗齋句曰洗卻俗情茶竈雨照清詩骨酒家鐙歲月
烟波雙鬢老江湖風雨一蓑秋

葉布帆舟工書愛友見其書扇曰東風作暖凍全銷買
醉平山一棹搖二十四橋殘雪盡都來湖上化春潮

徐芳洲名駒曰只恐夜深郎寂寞挑鐙添繡一枝花

丹徒周愧廬必華工書竹西亭坐月曰追涼來此地暝
色起岩阿疎竹月輪靜空亭螢火多宵深生几席鐙影
上藤蘿坐久素心愜還思夜夜過

甘泉汪碧峯俊工畫有句曰盈盈堂下花息息堦前草
物豈不自愛其柰秋風早

江都李漁莊澍工琴畫桃花曰非是故描輕薄態要將
春色寄同心

江鄭堂藩字節甫有句曰子夜愁聞籤策歌滿天風雪
戍交河君王莫更開邊塞青海西頭白骨多

道士王樸山至淳工奕解琴善書能畫有句曰從此向
人誇富貴堦前新種牡丹花

余客嶺山僧舍僧以金山贈帶圖乞題余題曰使君坐
處尙空懸已向山門玉帶捐我借禪牀三月住一無所

贈愧書至此適客至遂出肅客數友在座欲續之坡仙
前賢紛議未定余返乃續腰纏二字

白沙張芷仲沅題余詩話有句曰得句揮毫傳手澤尊
師取友重心知

如臯石書勲崇鼎忼爽瀟灑有氣節登攝山句曰四圍
暮色中峯見六代秋光兩岸分野客維舟侵落日山僧
開戶納歸雲郊行曰遊蜂先我過橋去知有花開在水
西

石運南昌圖書勲弟也倜儻如其兄題竿懸蝙蝠譏聯
宗者曰昏夜跳梁未幾年長成羽翼欲昇天明知鼠輩

原非族借重高竿一線牽

如臯范藻仙景瑗弱冠著作等身遊山曰境漸由佳入
乘從最上求新柳曰著意凝妝趁少年又曰淺能作浪
初臨水疎不因秋也怯風

通州朱石甫瑋詩字雙絕余畏友也題余隨園問字圖
曰海內靈光魯殿尊掄才湖海幾人存文章六代江山
秀衣鉢隨園付快園

如臯鄭生伊字任堂竅濱副車孫居白蒲鎮俗尙書禮
君子鄉也生敦厚誠樸聰慧好學有咏迎春柳句曰疑
逢佳客頻開眼爲迂東君學折腰

蕭泰初名銘揚州府學工詩好義樂善愛交鄉邑稱爲
善士其暮春句云露凝麥穗畦生浪風動榆枝地落錢
中秋客中聞生子信云秋花老健春花發璧月真宜此
夕看七夕云世間多少癡兒女七孔鍼穿綫一條

陳受衡名均號柳橋江都人工詩愛友風雅重義其鶯
轉句云清音似教人求友巧語如聞客鼓簧夜宴句云
佇月滿斟留客酒籠紗徧照礙人枝暮秋句云爭奈重
陽還未到愁人風雨滿江城

黎用揚名青號選亭廣東人敦厚温和偕友公建濟嬰
堂諸善舉誠佳士也和關鑑湖明府畫梅四首之一曰

庾嶺同芳譜江南寄此春笛吹花不落書帶草偏神卧
雪懷高士揚風有故人借觀東閣贈韻致獨超倫餘見
後

快園詩話卷十一

江寧 凌 霄 芝泉

余輯詩話凡送詩來者一聯一句或未入集者皆入詩話有全首佳者不拘首數彙爲鍾秀集楊補雲部曹題鍾秀集句云又添鏤網千層密不使珍珠一字遺

余詩不自存稿初吳蘭雪部曹以余詩合汪玉屏張老蘊江素山詩爲滇鷗集百菊溪節相又以余詩合方子雲余秋農詩爲江左三家詩存石琢堂殿撰又以余詩合方子雲余秋農張老蘊王柳邨謝佩禾詩爲江淮六家詩選然見諸剞劂者尙未及十分之二故吳砥山太

史贈余句曰人盡求狐腋君惟露豹斑

王簣山觀察風雅愛士有士人新年呈以詩曰連朝漸
覺笑顏開蘇到楊枝綻到梅管取寒廬成樂園專期春
色渡江來椒酒辛盤正盡歡何人念及廢儒餐新年莫
怪無從訴棋子初投國手難公子公孫聯登科第人以
爲愛士之報

陳雲伯明府文述爲人行事酷肖范文正公有女無力
字者嫁之喪無所歸者殯之屢以冬衣贈寒士其士人
報以詩曰廣被來遮雪裏身牛衣寒士頓精神果然冬
日真堪愛頃刻能回黍谷春高閣惟娛片刻情萬錢買

醉尙嫌輕何如畧展移暄手直使寒儒感一生公撫之
愈厚又獻詩曰昔日漁洋愛野人至今佳話播猶新邨
知二百餘年內竟有名賢步後塵雪中送炭古來難莫
笑寒儒竟素餐日後留教人羨我居然無恙臥袁安其
家童稚亦歌曰昔畏逢三節糧空債又催今偏思節至
預備笑顏開未冷衣先製將饑粟已來欣欣榮小草爲
得近蓬萊五袴之歌不得擅美於前矣

浙江吳澹川先生文溥歿其孫仁燾幼家有五棺未葬
王柳村徵君詩曰禾中書到爲沾巾南野才名不救貧
破屋五棺被霜露麥舟相助更何人黃秋谷太守見詩

贈以地謝佩禾贈柳村詩云南野如東野文章不救貧
五棺猶未葬七字竟成仁名姓他年事交情此日真關
山正搖落吾輩感風塵陳雲伯明府見詩助其孫舉五
棺而葬之蕭晴岩賦詩曰富貴天原畀善人但能行善
莫憂貧請看誰及巖商厚徧聽都傳大令仁五樞承恩
齊入土二公積德妙如神我爲陌路旁觀者感激無端
淚染巾

江月樵巖尹登岱云萬山如浪湧孤客似雲浮當頭月
云至高雲不掩無極物同明寒煙云水風收不起霜月
照全空寒花云未經風日暖深感雪霜仁咏桅云一鐙

隨月上倒影似槎浮咏柁云任涉波濤險全憑掌穩牢
皆可誦

滇南寶松溪大令欲峻工詩善書有賢聲宰鹿門時見
余詩話以聯寄余云尙餘一臂能扛鼎獨具雙眸慣揀
金又咏鏡曰前身知爾爲明月來世逢君或美人詩多
不及備載全首選入鍾秀集

王柳村徵君豫樂善愛友余寄之詩曰束髮論交久行
將四十霜昔年皆未壯今鬢兩俱蒼目暗君扶杖肢殘
我在床及時須把晤珍重此斜陽

旌德汪玉屏坤字元至和藹瀟灑游幕均陽寄余詩曰

書來猶說尙蹢躅且喜年來稿盡刊一代才原歸數運
千秋業莫補饑寒在先射虎心何壯此夜聞雞舞獨難
但望好音頻慰藉君能加健我加餐君幕滇時見鴉片
煙筒戲咏云柯亭有材不作笛一竅中開任呼吸送抱
推襟藉往面噓寒飮煖憑消息時時腹效東床坦兩兩
咀含夜能短共吸初疑卷碧筒雙吹不是調金管從來
香火因緣重天女維摩作清供搵玉燒蘭可奈何垂涎
儂亦幾摩挲不愁鶯粟花開少但願雞林客到多

甘泉謝佩禾堃工書愛友贈余詩曰廣陵煙月秣陵山
好景都歸卷軸間不是天涯留病榻那能詞賦動江關

億萬金錢撒手空早年王粲賦從戎蒜山葱嶺黃沙磧
都在饒歌漢曲中佩禾咏背面宮人云自知薄命難承
寵免惹君王見妾容志鉦和之曰妾心只解君恩重不
許旁人見妾容

高郵印穀圃天保工詩才氣過人紅梅云絳蠟倚粧扶
美女碧螺殘醉夢高人晚泊云蘆荻漸隨秋意老鷺鷥
能伴客心閒水患云風雲騰幾日人鬼哭深宵秋興云
流水三生娘夜渡高山一曲雉朝飛餘全首梓入鍾秀
集

高郵徐沐甫聯科卽事云孤雲山徑遠落照野塘寬贈

山僧云清涼正佳日歡喜有前緣羽山云龍雲挾腥雨
海氣斷秋虹登奎樓云爽生欄檻天風接涼到衣彩雨
氣涵海棠云睡起捲簾天欲曉酒闌燒燭月初低

高郵吳蘭舫兆熙新月云窺鏡勿驚捕黛女倚樓幾悵
捲簾人春晚云消除酒病三更夢破費春工滿地花

高郵陸琴風芹字泮賓曠達廉介虛心友士其詩有不
知身是客猶自遠懷人一天殘雪雁初過幾樹夕陽雅
亂飛之句

寶應芮春湖獻墀字石丹工畫善奕其家三世工詩有
贈別云笑談一尊酒風雨十年心又云千里辭家忘是

客一身多病已成翁

寶應馮丙山楨字蔭皋工奕有句云鐙隨村舍遠犬吠
水聲寒囊空轉恨歸期迫學淺翻嫌得句遲

儀徵王嘯雲鴻舉字際飛有愁極翻無可寄書之句

寶應葛香谷棉字民初咏雪句云雲低篷背重風逼櫺
聲清白同天一色難辨路三叉

寶應葛蕤溪綆字昭度香谷弟也過精舍句曰滿院閒
花開舊徑一燈清話慰離懷

儀徵談蓉菴鏡春草句云任他春水平分綠何處名山
不借青下士已甘居陋巷美人何必怨長門

吾里歐陽棣之大令斫工詩尙義贈余詩曰貧耶還復
病寂寞在他鄉兩載分飄梗三年未引觴身雖同老繭
詩尙滿奚囊吳質知能養何須肘後方

傅柳橋明府祖緒以雅工詩客如時日日相親至交
也咏秋柳云別具疎狂名士格亂頭粗服自風流

袁真來別駕已徑提田成路舟輕席作帆水到竹家
白鑑從遠處圓

泰州黃碩玉石工書畫畫餘詩曰無端萍水共驚蓬
道合都關翰墨緣名士文章真士酒一時高會短燈前
不覺度夏名流初散後逢君得暇時話在

至今人話白門秋翩翩書記昔從軍豪氣驚飛隴上雲
廿載功名同逝水不堪衰病對斜曛

天長程禹山孝廉虞卿工書愛友舟中云帆回知路轉
犬吠覺村來春草云新機春雨助前夢劫灰沉北郭清
明早南朝廢寺多荒塚云宿草碧猶昔墳荒鬼亦疑無
家供麥飯有客認殘碑穴古狐爭踞燐飛風倒吹棠梨
花下影淒絕月明時寒夜云夢裏吟魂歡聚鬼籬邊饒
虎坐窺人林外風腥知虎過山中月黑覺雲來客中春
日云心知花落偏愁雨客到春來每憶家擬古云脈望
生於書卽以書爲食豈必飽六經穀戲笑微質倘令生

田中亦當類孟蟹體未攀神仙害先滋稼穡乃知習俗
移善惡那可測智士愼厥初時時保令德遼西送竈云
江干只有三間屋就中竈與床相屬終日高歌泣鬼神
狂來踏脚翻孟粥竈神歲歲難安祠上天泣訴天神知
天神苦我不得死罰往遼西六千里今夕却憶故園別
又值填門大風雪土竈應供水一甌三更破屋寒颼颼
炊煙冷落歲云暮妻孥莫念行人愁行人不怨天涯遠
七尺狂軀任蓬轉竈神若問我如何此日高歌仍白眼
禹山佳作如林不及備錄惜哉淮關別後又不知幾多
新什矣

俞薰仲徵君鳴南江都孝廉方北也其題望雲圖句云
春郊寒食登山早秋圃黃花列鼎遲西山展墓句云匹
練迢迢通冀北青螺點點隔江南

大興余雪柴少府壩余姊丈也昔同客楚唱和甚多皆
忘之矣惟記有郢中白雪融詩骨漢上紅霞照酒顏之
句

戴貞石通守公望風雅工詩亦客如時舊識也有冬行
云林空寬客眼霜滑印驢蹄

廣東陳陶圃大令玉成到處政績有賢聲風雅工詩余
客如時舊識也近聞傳其咏色云有癖可能如好德不

荒未必便傾城聲云有誰作賦同金石未免牽情到管絃香云三日菴菴荀令座一杯鬱鬱玉人墳味云衆嗜雖同知者鮮萬情惟悟淡中長

雲伯明府開瓜洲河民以爲便歌頌紛陳志鈺亦獻詩曰古今勝地總堪稽利濟功原捍患齊淮海並傳雙德政陳公河與范公堤疏鑿河渠一路新潞洄春水碧鄰鄰知公福本如東海分取支流濟後人農工商賈各歡歌瓜步江湖達運河多少行人爭指點流通不盡是恩波居人珍愛兩堤旁不肯臨流種綠楊留得寬閒無限地他時好樹召公棠

雲伯明府署淮南巖守真州士民樂之劉雨亭沛生獻
詩曰忽聽錢塘一棹過滔滔淮海見清波地經佛到成
香土天爲人寒轉太和上有箴規當事少至誠調燮受
恩多想來懿行難名得惟獻揚州德政歌

李留村河尹當頭月云顧影纔能知我直問天何苦逼
人寒

王步康茂才履泰永順太守之孫余表姪也居余同里
凡書誦三遍不忘經史背誦如流題余邗上寓齋何陋
軒曰書有百城擁榮於萬戶封高眠宜雅靜薄醉任疎
慵此老才無敵當時墨尙濃

時乞先生
舊作書畫

小軒來坐久頓

覺醒癡聾余和之曰童嬾門稀掃春來碧蘚封太貧遭
賊笑久病覺醫慵筆禿字翻古梅殘香尙濃市囂無礙
近轉幸耳雙聾

快園詩話卷十二

江寧 凌 霄 芝泉

錢塘程玉尺度字龍翔黃春谷解元胡丙阜廣文皆其
高足也應書院試紅葉云冷淡疏林醉曉霜離情何處
不淒涼幾株斜日寺門閉萬點西風山徑長古岸無人
秋水碧江邨如畫暮雲黃羨他不買胭脂染一任春紅
門洛陽菊黃蘆白總宜秋最愛丹楓景獨幽逞豔絕勝
花正放相思欲寄水能流山空有客看樵徑江冷無人
落釣舟尙憶西湖殘照裏晴霞橫抹亂峯頭時曾賓谷
中丞爲兩淮都轉書其後云繪影繪聲風流旖旎不意

得此奇才吾欲喜而不寐

長白吉止齋尙書綸有句云林暖鳥聲早天空雁影懸
掀天巨浪聲猶怒隔歲驚魂我又來

王簣山觀察賡言和余韻贈余詩曰盛名海內重滂膺
冰雪文章逐歲增安得此身跨鸞鶴蘇門長嘯學孫登
少年歲月去堂堂故里田園半已荒喜得東南賓主好
春蘭秋菊一時芳尋春日日課新詩到處人言王濟癡
一樹花開拚一醉深杯百罰我何辭方

子雲謝佩禾張

老蘊王柳村

各擅場選樓高坐午風涼

謂君選詩話石琢堂殿撰亦選

君詩入江他年成就名山業奕世人傳姓字香

甘泉李冠三比部周南文望隆重一時名士多出其門
句云石巉奇似虎樹老瘦於豺日和冰盡解風暖浪微
皴累人皆骨肉誤我豈詩書春草云羨爾宿根存本性
也隨羣卉鬪芳姿紅葉云有葉自扶非仗綠無花爭放
獨餘紅文當老境詞偏麗人到衰年貌返童贈黃秋平
云風雲變幻成蒼狗歲月蹉跎惜白駒雄才小試空空
手古調新翻昔昔鹽飛絮影云牘有花魂憑寫照更無
色相豈沾泥化萍人憶前身幻映水魚驚過眼迷酒葫
蘆云五色羞同莊叟器一瓢較勝子淵厨

甘泉李夢白斗南冠三比部兄也有句云雁背帶霜天

際嘆客身負月道中行骨瘦自知綠老病多情猶爲課
花忙

天長戴暢村奉直景和畹香殿撰父也敦厚謙和見其
游極樂庵題謝佩和詩草曰解纜停湖曲攜羣古寺中
連雲瞻峻閣把卷識宗工春草生池綠芙蓉計日紅千
秋家法在歸釣莫怱怱

寶應芮愛山近綸字君言奕中國手豪俠愛交其詩曰
閒臨古帖近牕紗小院曾栽數種花天水烹茶隨意啜
奕棋人散夕陽斜昨夜雨濕濛濛惹起春愁恨轉蓬
最是關情新燕子雙雙偏識舊巢中斷句有帆檣雲外

隱樓閣水中明地僻閑栽樹居幽巖築墻草芟餘綠柳
花盡賸青松

寶應汪潤郊元春字沛膏工青鳥之術有句云雨過雲
無跡潮回岸有痕山入混茫青到頂水流天地白無邊
皆樸實自然

吾里王應星太守彝象余姑表兄也工奕守杭時得句
云人意閒於鶴江光載一舟

上元談竹塘刺史逢堯余舅岳漢黃觀察子也咏白海
棠句云小景徐熙如貌得但須傳粉黛香寄語莫燒
高燭照玉環非復醉時容

吾里陶孝廉外翰濟慎金山解元孫厚安刺史子怡雲
郎官弟余表妹丈也題迷藏圖句云東手得來西手去
笑他偏在暗中忙眼明手快人多少不及兒童片刻歡
揚州馬振遠字素園治內症如神猶僧曙開之治外症
也皆堪獨步記會詩其家時所咏綠鳳仙有指尖合染
春蔥色之句歎其精絕

吾里楊桂堂給諫煊余襟弟也咏鷹云眼高可謂空凡
鳥腹飽緣何棄主人

歙方紹餘溥方以虛廷瑞皆余表兄也紹餘莫愁湖詩
曰功名久已視如塵只有情癡尙認真一樣樓中覩遺

像王侯不拜拜佳人以虛秀芳閣詩曰銀缸坐對話深
更無限中腸不易明疏豈相宜親未許最難爲是此時
情自紹餘返歎以虛捷後官湖前別駕遂別至今矣
太倉王小蓬磨孫王影山帖孫永州太守兩公子也記
小蓬句曰寄情思入畫行樂夢游仙二君皆不知宦游
何所矣卅年之久思之惓然

龍泉陳學夫公子詩余最厚友也其渡江得句云未渡
那知風力大中流始見浪頭高余爲足成之

卞芝軒大令枋有句曰人生年少好春是少年人亦余
足成之

貴巍卿貳尹正元曾館余於休園七月七日廣招名士
會詩自題所畫紅蘭警句曰楚國王孫本赤心

余四十句有云到此無間安足畏將來縱仕已非強五
十句有云百年過半身餘半一事無成病已成丙子五
十亦有句云果然蒲柳姿先損未必桑榆景尙佳

儀徵阮梅叔明經亨芸臺制軍弟也敦厚謙和獎濟寒
士鄉里感誦之著有珠湖草堂集其中警句曰楊柳春
風調馬地桃花細雨賣餚天鐙影似星穿戶山月華如
水隔簾流名心更比詩心淡歸思翻因別思留幾樹綠
痕潛破柳一簾香氣暗通梅地高雲氣侵衣濕峰斷湖

光潑眼來鄉心似月三秋滿詩思迎潮一線來貪看山
色墻低築愛聽禽聲樹滿栽

清江張尊生龍象邁愛交佩永贈以聯曰酒拌名士醉
劍共美人評

吳縣吳曉峯寶名有句云河梁一分手覲面異鄉難喜
爾容如舊嗟余影已單謀生休問計同客且言歡不覺
簾前雨淒淒夜又闌

江都張松臞鴈鼎有句云滿身黃葉帶秋歸草荒嘶病
馬天遠數來鴻秋如社燕行將別人對寒花瘦可憐

余伯岳丁副車鰲有句日報國無才鳩杖嬾傳家有具

硯田資子垣名明經孫金榜金詔皆捷

余纂志東亭染患來揚東臺金詠堂廣文撰寒日來揚探病贈余一裘數載賴之及先生歸道山余以聯輓之日積德名留當代志傷心淚濕去年裘

余平生多朋友緣臥病七年承獎濟脩至者如陳雲伯諸公已記載九卷中年來復有噓寒惜煖情意交摯者同城則王簣山熊介茲兩觀察黃秋谷太守王柳村徵君謝佩禾太學解昂齋布衣談蓉龔居士遠道則東臺之姜程蘭蘇雲巢都門之梁德圃佛寧安錢唐之袁真來西江之傅柳橋刺耀州之石蔥佩宰澗江之歐陽棣

之宰鹿門之寶松溪秉鐸梅溪之謚味堂幕均陽之汪
玉屏幕琅鎮之王步康他則蟻山蒲上梓里眞州各友
人也吳履堂太史題詩話四首之一曰古人懷德重宣
揚一飮從來示不忘爭及快園老居士千秋詩話姓名
香

唐楚珍號六橋工醫愛友有句云維舟楊子渡托跡廣
陵泉鴻爪初留雪鵬飛未戾天

曙開上人念舊愛才久而不倦嘗招吟侶會詩咏新綠
上人得句云花落有餘春衆皆調筆

王柳村徵君詩壇耆宿著作等身念舊愛才交徧海內

初以孝廉方正舉辭不就乃舉山林隱逸記其警句曰
萬竹不知地金山都似雲貧嗟人易別老覺袂難分溪
痕青過雨柳氣白通潮鬢因經世白眼爲愛才青客罕
雪封徑寒深竹掩關亂山到海盡遠水合天流知否妾
心怨秋色臨江不敢種芙蓉東亭百里無楊柳不識春
風有別離時余與合稿又愛小村又邨兩令嗣才乃贈
之聯曰他日附名聯六逸此家有筆繼三蘇

王小邨茂才屋柳村長子也家學淵源有雛鳳之目愛
其句云山曉翠欲活水開岸疑浮城轉炊烟間一塔出
衆綠雪留三徑白山迷四時青微風吹酒香知近蘭陵

驛劍是英雄氣花爲美女魂人事淡隨江上水詩情壯
壓海門濤到來莫更誇烹茗家在中泠第一泉

主又邨敏柳村幼子也時稱難兄難弟其句云花送四
時香山流太古綠市近酒香出僧定磬聲稀

江南王春岩茂才右生交廣而殷才捷而勇詩中驍將
也尤工詠物詠簾句云捲處夜寒貪有月垂時花落悵
無人芙蓉云縱有繁華那算春梅格云冰雪聰明原在
骨孤高情性自成家曲欄云人倚愁腸九折同燭淚云
剪處漸灰心寸寸彈時曾溼指纖纖憶燕云我知繫足
絲難在人望我懷夢有期讀岳傳題云知幾老將騎驢

去料事書生叩馬來送行云柳嫩如金折贈多全首者
入鍾秀集

談蓉菴慷慨尙義風雅愛友詩多精思其春草傳句已
載前卷中茲復記其春草句云馬頭細雨人千里牛背
斜陽笛一枝也知未受栽培力敢忘無私雨露恩懷人
云愁憐小戶難澆酒貧愛空囊好貯詩秋遊云楊柳送
青眼蒹葭已白頭看梅云曉寒千樹雪春雨一身苦早
春云春在雨中忙題照云人同仙鶴瘦松作老龍吟桃
花帶露桂云僧迎前度客人問小山花紅梅云丹砂今
已得莫問幾生修扁豆花云同根別有相煎句一頃還

聞行樂詞春飲云春雨乍晴嬌鳥喚梅花正放故人來
檢詩云共憐往事如蕉鹿各檢殘篇感雪鴻黃葉云綠
陰猶記客追涼全詩選二卷入鍾秀集

甘泉李琴軒茂才桐字于揚篤於愛才殷於念舊有雜
感句云無病幸邀神鬼恕有求難怪友朋疏書味云香
共菜根常淡淡佳如蔗境入層層殘燭云詩剛得寸毋
庸刻酒未能狂已漸昏贈玉屏云蜀道已過難處少南
天得到壯遊全秋葵云信宿不留人再見及時惟許菽
同烹客中云客中過節歡先減雨裏思家夢倍長燭淚
云風前易落同衰老歡處仍拋況別離郭璞墓云卜葬

有方難避殺拜瞻無地况招魂寒月云欲邀人賞惟紅
友始信冰清是素娥秋鐙云雨深涼夜昏無燄人共蒨
堂聚有情古井云厯溯何曾因邑改細看迴不見波橫
枇杷云有客園中攜酒醉是誰花裏閉門居海上小築
云樓高莫便疑爲蜃居小何妨說似蝸剪秋羅花云山
林雅合秋雲罩草莽難將玉尺量贈菊云非無香色惟
求淡但有笙歌不稱花鸚鵡硯云底須斷瓦懷銅雀不
必臨池羨鳳凰孫伯符云公瑾多才同命短仲謀有福
賴兄賢餘人鍾秀集

歎汪榆谷保孫贈余詩曰功名人已等浮雲檄藁當年

手自焚清俸常分賢令尹新詩不讓古參軍琴書拋棄
應慚我珠玉收羅却羨君同是思歸歸不得故山猿鶴
帳離羣子菊泉工畫

快園詩話卷十三

江寧 凌 霄 芝泉

汪叢睦太守以子貴誥加資政大夫適見燕來寄興曰
玉剪金釵色色工杏梁原在五雲東一生溷跡香泥下
千古知名白社中失偶淒涼眠草碧銜雛辛苦啄花紅
幸他王謝諸郎貴粧點烏衣與鳳同呢喃渾不是啁啾
社日春風自在遊海上朱霞猶照頂宮中綵線早纏頭
竟教多占鶯鶯閣也許高居盼盼樓到底晚晴人最重
趁花飛舞向皇州余賀之曰紫雲一朵降階庭鄉里羣
誇報德馨天爵修多人爵晉福星畢竟是文星日長可

喜卽春暉舞綵承歡興總飛眞樂別高人一等笑看金
紫作萊衣位尊多在齒尊時政務勤勞日費思誰及先
生無量福起居八座但吟詩廣廈寒儒氣亦揚壽觴飲
醉又歡觴他時公子忙調鼎請自閒開綠枰堂又和咏
燕日愈到春深舞愈精舒長時日正清明玳梁成壘原
相賀杏苑將雛舊有聲瑞世自應同綵鳳遷喬竟得並
金鶯紅襟紫綬天然貴王謝眞宜累代榮

張硯峰孝廉工詩畫繪七賢同濟圖并題詩曰里有參
軍今高人賑飢行義家爲貧多年抱病困躄旅饘粥無
粟炊無薪良士行將委朝露惋惜聲都聞道路天將果

報示人間暗使羣賢相佑護賢侯德政古所稀濟人尙
覺豬肝微薄施不肯使凍餒飢授之食寒授衣繡衣執
法兩使者分俸憐才世亦寡昔年賢守今榮封借煖噓
寒不相下名進士與賢茂才高僧時復慈雲開茫茫大
海竟得濟塵寰有地憂堪埋向平婚嫁漸能遂累代書
香期不墜始信袁安守分高不妨安臥柴荆內濟者受
者名俱香作歌作畫聊稱揚善必降祥足堪信千秋可
以風吾鄉陶渭川明經題曰善著名逾著人窮學不窮
七賢爭見濟千古實堪風此老吳嘉紀羣公周亮工

熙朝續佳話前後頗相同熊俊園上舍題曰此中高

臥竟安閒塵海茫茫渡不艱莫道一舟如葉小載來恩
德重於山

南城曾賓谷中丞燠遊篠園賞芍藥詩曰落花風雨太
頻頻今日湖天霽色新造物有心憐小草主人加意護
餘春朱家二圃名猶在坡老三過跡已陳手擘紅芳一
惆悵當年刺繡費針神汪叢睦資政和曰一番花事往
來頻同此芳名各自新五色地延千畝瑞九重天繫兩
家春雲烟本愛園林舊風雨難磨姓字陳閣下詩傳紅
芍藥繁絲輕縷頓精神余和之曰遊多餘暇不妨頻同
向香天放眼新一座飽嘗無量福萬花留得未歸春茶

因品水當階煮筆爲題詩滿案陳金帶圍祥知有繼紅
雲擁護已怡神

焦山僧借菴清恒字巨超贈余句曰抱病綠楊城心清
體自輕春風吹大地是日春日短榻話平生慷慨詩無敵艱
難歲又更奇才天必妬莫與世相爭

儀徵江少泉茂才德芳蔗畦太守子秋史榜眼弟也詩
筆清俊其楊花云春深紫陌猶飛雪風暖青樓盡脫棉
咏醋云風味不禁酸一點書生態度美人心

石谷住持揚州高明寺工詩愛友贈余詩盈尺佳什如
林不及脩錄余答之詩曰梵宇琳宮壓水多耽吟中有

老維摩禪關咫尺無由啟孤負從前幾度過都說詩禪
領上方甘分珠鉢齒猶芳瑤編贈我焚香誦不見蓮臺
拜也忙

心朗號盦亭揚州隆慶寺住持愛才好友謝佩禾贈詩
云繞徑萬竿竹當階兩株樹此卽閉關人終日譚經處
慶庵老和尚頻牧隆慶寺心朗師也有詩云大用不揚
眉猢猻照古鏡心燈朗月輝國泰民安慶

吳朱占生茂才釋鬯贈余詩曰斯人小隱寄邗江臥聽
春潮怒拍撞金紫不縈塵夢淺薜蘿歸老壯心降曾將
長劍揮南服竟著奇書倚北牕莫怪門前車轍滿臨文

隻手鼎能扛

寶應吳古亭茂才曰鼎咏項王詩云謂王爲英雄江上
如何弑義帝謂王爲奸雄壩上如何放劉季英雄奸雄
兩不成學書學劍猶如是吁嗟乎八千子弟付東流獨
對虞姬哭不休

慈雲庵僧聽雲贈余詩曰見說凌夫子詩豪力莫排酒
杯空歲月聲價遠江淮禪暇得來訪疴沈難放懷高軒
容片晌憐我是同儕

揚州谷曉山鰲字獻林工醫初夏戲占云笑此木綿袍
偏逢入夏驕羨他青海外冰雪未全銷古雅深遠

葛晴江茂才練贈余詩曰愛人高義本如雲貧病何嘗

減半分畢卓袁綵調纓蕪制軍簡齋太史曾問字孫登洪邁共論

文謂君與洪稚存太史孫藏來妙墨皆知寶君舊時字

能作人皆寶之交得名賢盡出羣典被刊書甘忍凍是真清士

老參軍

甘泉程雪門立字書之聰穎愛交詩筆清雋夜話云祇

有山川增閱歷那能文字免飢寒雪美人云如此明眸

真剪水果然仙骨竟裁花却爲散花來世外非關咏絮

立風前秋夜云鐙影照殘孤枕夢秋聲消盡少年心問

病云我未工詩窮已召君雖作遠病猶來歲除云寒不

能消惟戀酒債無可避強吟詩雨中客至云貧能諒我
自攜酒情爲傷春同惜花哭陳石泉云早叅慧業應成
佛乃見交情尙有人幾點雨聲來燕子一番風信上櫻
桃問曲云親裁白紵雖無分細按紅牙定有人初冬云
夜氣欲凝池面水曉霜先瘦畫中山送友云客意如明
月人情比石尤

吾鄉胡雪房明經照贈余聯曰勸善者天胡使斯人貧
且病承恩者衆轉勞外客憫而周

上元余秋農明經工文章通小學精推步善八分隨園
師稱其古詩有大氣力縱橫如意今記其近詩警句江

行云一片布帆風似駛但看兩岸有山來秋懷云也知
心上山無數可奈床頭劍屢鳴孔雀云毛羽似君宜愛
惜文章如此尙樊籠種花云垂頭不語還羞面新種花
如新嫁娘咏雲云但許美人堆鬢上有誰名士吐胸中
暫藏湖海情非懶得近蓬萊色白紅大風云欲吹山作
地龍送海升天耳閉云飛泉鎮日下幽壑清磬有時生
酒房一任市人傳有虎但知西國號無雷家居云兒讀
生書頻問字親留熟客不增肴補竹云熟客忽迷當徑
路芳鄰驚見出牆枝滌硯云笑爾面塵如我厚有誰交
道比君堅待月云知有美人凝似我晚粧吹燭倚高樓

社日云散後雞豚渾似夢望中桑柘總如雲靜裡云屋
漏巧當星一點簾波碎剪月千絲聞鶯云爭怪苦吟人
易老祇渠聲不似從前蟬云但飲都無事長吟過一生
天界寺云烟棲畫壁薰成墨苔上金容繡作班客去云
將典裘多離別色重編詩費掃除功登臺云雨痕如弩
下雲勢作山來解纜云舟移漸覺橋東徙雲疾翻疑月
倒行立秋云漸知歡愛當時錯便覺炎涼此後平驟雨
云虹騎遠岸橋爭出雲墮平蕪塔讓高病起云偏於此
際聞人死又放餘年讓我狂百事未遑先洗硯一端最
急是澆花偶成云客久不來猜是病春如未去急須遊

看花云君不見招吾亦至酒還未設客先醺新秋云暑
似愁心消不盡涼惟病骨最先知却聘云雲路何堪鞭
竹馬天香應不染荷衣蕭索云酒愧屢賒荒客去衣難
易着笑兒長探囊自掃游山興乞米人傳辟穀方哭金
梅峰救其門人致溺云奇事稀聞師殉弟遺孤剛得女
爲兒夜臺桃李休開館秋水芙蓉好築城準情縱異逢
蒙殺畢竟難爲宰我仁秋懷云未官且用石爲印學佛
但須金滿身移榻云得月又愁多受露遡風惟恐不當
花

宋之山太史祝余詩云金粟如來是後身黃花爛熳祝

生辰但欣兒女能承志何礙偏枯作半人不朽之名真
可壽多文爲富總非貧那須九轉還丹藥心太平時卽
養神

甘泉孟玉簫生金輝號廿四橋詞客工書畫精篆刻耽
雅重交夏日句云笑煞無知雙粉蝶自投蛛網學鞦韆
影園云殘荷猶向晚烟紅衰柳顛教斜照冷納涼云風
軟水紋細雲奇山勢多揚州懷古云金帶圍邊思宋相
玉鈎斜外弔隋妃雪梅云春破柴門纔幾夕紅顏已到
白頭時康山云山不在高名自古人惟求舊品原清

真州張少蓮官保字庶和天性至孝慷慨重義遇一知

已肝膽可披今之烈士也其近句春樹云在山能助色
得地便生春楊花云不自知飄泊顛狂又一年雪花云
如來拈不得天女散何忙鏡云面目看來似心肝照出
難琵琶亭云偶然一到春衫溼況是重來白髮生客中
云攘臂釀成騎虎勢捨身不及喂鷹僧萬苦脩嘗支敗
局百魔不動坐禪僧荆山云當年若解深藏璞豈有傷
心痛哭時吳江云猶幸伍員無肖子鞭屍爲報父讐來
大澤云天留三尺誅秦劍不鑄金人十二中葛陂云從
前只道爲人易容易原來是學仙

眞州張石樵安保字懷之工詩古體沉厚記其近體警

句龍潭道中云鐘鳴僧寺近霜重馬頭寒迴笠處云山
勢壓檐重江聲捲地驕春草云迷青回古砌分綠到荒
園歲暮云曾無白鶴馱腰裏又近黃羊祀髻司明知花
柳春將轉無奈冰霜氣太寒曹孟德云若使終循臣子
分亂時原覓此才難

快園詩話卷十四

江寧 凌霄 芝泉

孤雁哀鳴望彼蒼寒風凜冽稻田荒明知斷送衡陽路
留取全身潔似霜此次女志珍自題白雁詩也王步康
爲之記復綴聯以輓之曰嫁如未嫁時無舅無夫又無
子死有不死處全名全節是全歸

余跋曰嗟嗟我女死爲貞魂千辛萬苦退無後言矢志
靡他留此圖存賢孝節烈無忝我門

滄州張傳山河尹百祿追摹遺象並題句西江曾賓谷
嵯帥煥真州汪劍潭資政端光山東王簣山廣信元和

錢次軒杖粵東熊夢庵方受三觀察安邑宋之山監正
葆淳錢塘陳雲伯明府文述新安吳才甫外翰榕錫山
浦情田守尉承恩上元寇坦之守尉磨趾仁和汪月樵
嵯尹之選古歛黃秋谷太守至馥江都黃春谷大令承
吉甘泉李冠三比部周南古歛洪賓華殿撰瑩儀徵阮
梅叔明經亨泰興季廉夫幕府爾慶江都吳筱莊文學
克讓甘泉許春卿茂才之翰甘泉謝佩禾上舍堃丹徒
王柳邨徵君豫各題句俱載鍾秀集

王柳邨徵君女子久迺敬未字夫故守貞養姑余題詩
以表之曰我與徵君卅年友氣味相投事亦偶我以筆

墨伴此生君向書城常坐守君素愛交兼愛才我曾結

客園門開

謂白下快園

薄產我因賑飢破濟人君久傳江隈

漸衰老態捻堪憫君目雙盲我肢損惟餘吟癖皆難除
唱和詩筒時往返我女守節能養姑無姑可養仍殉夫
捐軀絕粒成節孝表揚共咏哀鴻圖正擬郵箋索君句
君忽雙魚來尺素索我詩彰孝烈名觸我中懷淚如注
君家有女年甫笄未字夫已歸陰司投繯欲殉不得殉
守貞甘與姑相隨痛已勸君勿酸楚成我二人賴二女
寒氊寂寂一無聞清名得此芳名補從今更好姓名儔
傷我懷還慰我懷有女家風同不愧豈徒詩卷播江淮

時石琢堂方伯合余
與君詩入江淮六家

余選刻鍾秀集劉外穠寄詩曰千秋風雅是詞林萬戶
千門自此尋惟願選詩如選色過人眼目動人心

菊坪姪寄呈陳雲伯明府聯曰迎人和藹程明道稀世
仁慈范仲淹贈曙開上人曰詩書畫已稱三絕仁義慈
還並七賢

周菽原幕府題七賢同濟圖曰非翁不足承高義一幅
圖成雨美臻最羨羣賢仁智脩愛人難得是知人

余輯鍾秀集菊坪姪取讀之各跋以詩其跋汪月樵
尹詩曰不但新詩衆口傳扶持風雅義尤堅若非遠宦

餘東尹定有圖成號八賢

謂張峴峰孝廉以汪劍潭資政王質山熊介茲兩觀察陳

雲伯明府吳才甫外翰許春卿茂才階開上人合繪七賢同濟圖

陳雲伯明府黃秋谷太守助吳澹川家葬事王柳村謝佩禾蕭晴岩有詩紀之已載前卷中余家亦有三棺未葬雲伯秋谷復助葬其二佩禾又紀以詩曰德厚仁深是兩賢澹川助後又芝泉世閭不少憐才者誰解推恩劉青年

余快園雙桂書堂錢梅庵尙書保書額曰九代讀書堂後余讀書晚靜閣孫淵如觀察題曰曠世逸才陳桂堂太守廷慶書集聯曰此地有崇山峻嶺茂林修竹是能

讀三墳五典八索九邱

汪月樵巖尹濟困愛才久而不倦官餘東每來揚寒士
多被其德而於余尤加意云見其警句冬煖曰就日襟
懷如中酒偷春格律合吟梅咏白牡丹曰人如閨閣千
金重官比朝堂一品榮芭蕉曰梅雨滴不破暑風吹乍
開北樓曰地偏僧似鶴樓好客如仙

甘泉趙幼泉明經洵字汝川少負意氣學有經濟著周
易臆孫武子捷解河防議等書詩多警句其陳園句云
月來一窗竹風過滿簾花白桃花云肥添梅雪幾分色
笑解梨雲一片愁上河議歸舟云碧隴到秋仍臥水荒

村過午幾炊烟佛手云如仙但作黃金色不肯慈悲點
石頭臥雲巢云餘年易盡如錢少小屋偷生比墓寬
趙彬仙茂才正文幼泉明經子也偶儻工詩有句云烟
霞今日事花鳥少年心高樓秋信早古寺月明多乍晴
山意綠初出月光紅落日留孤塔歸雲識遠山烟定香
無跡花搖月有聲秋先侵蓮簾月暗度銀床月冷憐花
瘦燈昏怯夢單一劍未酬知己德千金曾散少年場種
竹正宜今日雨移花莫去舊時泥

甘泉黃蔗塘明經兆萱其父述齡工醫有半仙之號有
自遣句曰旣到殘棋難變局縱教涸轍不隨波兒因養

病書聲少我爲消愁酒債多贈阮梅叔曰交遊海內多名士嘯傲人間是謫仙萍曰不知飄泊隨流水猶認前身是落花

揚州高明寺住持石谷悟成字方聚愛才好友見其警句曰月沈山色遙難辨柳暗漁燈獨自明青山無計留人住綠柳多情送客行妙藥應難論價值真金從不混泥沙生死早翻空裏案輪廓漫著夢中棋放眼每窮湖海外閒吟多在谷巖閒有寺空黃葉無人贖白雲年年梅子當軒熟歲歲桃花映水紅古樹閱人悲短叔疎鐘醒夢發長歌若非隔歲栽培好爭得當春取次開溼雲

低壓水涼氣暗生衣佳句初吟天若助名花再賞客忘
勞禪心空夜月詩意豔秋山閒階風靜鶴初睡古渡月
明僧未歸截江帆疾如飛鳥摩漢松高似立虬

聞都中至好盡職有聲喜甚寄之以詩曰平生喜得大

賢親前有洪

有直聲

孫

有政聲

後有陳

有惠聲

今日病餘居陋

巷父聞折檻直言人

孫淵如攝廉訪時和致齋相公遣使詣撫軍撫軍禮之
恭使遂驕僭孫按之竟荷以校時服其風骨其寄洪稚
存有句曰折檻風流成勝槩埋輪心事有誰知

歛籍寄揚汪茂千議叙椿年工醫號杏林呈族叔劍潭

資政曰竟教草墊飄蓬客許附萊衣戲彩行瓶菊曰傲
不傍人籬下寄清還助我案頭香和包慎伯孝廉曰笑
談便爾傾肝膽患難非徒托酒卮

錢塘陳汾川奉政時字履中好善有隱德以仁厚世其
家工書善奕精音律著種藥齋詩其警句云綠借鄰家
樹紅分小圃花松花糝棋局竹露滴琴床草堂邀乳燕
竹徑待流鶯漁竿臨水檻酒幔隔花樓野人譚稗史稚
子課農書征夫愁遠行妻孥反色喜不是輕別離祇爲
厨無米

陳雲伯明府讀禮回籍余病不能送饋書二百卷以自

代并系以詩曰病難親送瘳傷神幾卷詩篇且代身此
去秋江潮正漲請將情意比注倫明府旋以文房各玩
見答

快園門前楹帖曰二十世公卿門第七百年書禮人家
先大理公忠節祠楹帖曰一時忠節齊方景百代詩書
毓子孫雙節孝坊柱鐫聯曰六十載冰霜承妣訓幸我
無慙婦職二三行孫子守家法望伊克繼書香蓋方太
宜人遺聯也

冀老人性達九十自壽曰人人頌祝賦高歌歲滿期頤
又若何蚊到秋分蠶到繭縱然有壽已無多後竟至百

二十歲

俞薰仲徵君以滿粉見遺謝之詩曰愛人兼善助才華
偶惠嘉珍亦大家一自蒙公頒玉屑至今出口盡蓮花
曙開上人貽竹萌佳茗紀之曰睡魔縈擾面生塵何處
蓮臺問夙因幸有禪宗施妙訣療人俗更沁人神李島
軒公子以月餅面贈酬之曰入秋懷抱未曾開瓜果全
拋懶舉杯自詡今宵吞有月況從太白掌中來九日有
饋筵饌者卽荅之曰滿城風雨太牢騷冷度重陽氣不
豪助興昔人惟送酒流涎今日正題餽蕭條忽變成佳
節珍錯紛陳况巨螯徧插茱萸同盡醉闔家歡譙勝登

高數年間海上友朋每得異味源源見寄最美者古豐
徐珠浦運副之鱗鯨浦上吳二泉公子之飛蟹贛浦江
立亭茂才之鯉東亭金石渠上舍之海參吳陵夏紅舫
茂才之鰕浦淮安程菰香公子之海螺東淘汪茂干議
敘之蛤蜊皆數百里遠將惠寄良可感也江南土物壻
馬純之寄供至饋食品之屢則陳雲伯明府寇坦之守
尉金石渠上舍爲最因記謝惠食物詩附誌於此

竇松溪明府詩入鍾秀集茲復記其零句偶占曰教子
敢期聯聽鹿爲民願夢衆維魚鹿門山曰穿草泉珠堆
玉醴持花笑口破金顏新柳曰眼飛烟外初窺鳥腰舞

風中學拜人署中曰習雅役夫偷看字消閒胥吏每鈔
詩贈何明府曰老境佳於嘗倒蔗新情好似愛初蓮盤
香曰燃落團灰描太極裊來細篆繞雕梁夜深紅豆懸
虛室風引青絲達上方我是儒林烟火客不須頻熱九
迴腸峪山曰古佛當門迎客笑老僧披衲接官忙村居
日落葉作薪雲蕤竈新泉煮茗雪翻盆

粵東黎選亭賁奏以玻璃扇二柄見贈系以詩曰璫璫
渾似習采慰蟬翼冰綃未足奇但許搖風難障面請君
轉贈美人宜

雙節孝坊在忠節祠嘉慶九年建孫伯鼎資政撰記洪

稚存學政書丹桐城姚姬傳秋曹鼎書聯曰一代孤忠
一時雙節千秋豐祀千古芳名

元和李鳧軒上舍子喬號冠卿雪濤大尹子從學於外
舅黃澹人大尹詩學蓋本自兩名進士也爲人真樸謹
信有句云樹暗陣雲驅暑去窗鳴飛雨挾風來雲移岱
影羣峰出風送泉聲萬壑鳴韋簫謳歌圍老圃牛車鼓
吹嫁新娘

陳柳橋九月三日登蔣山不果曰蔣子山前一望秋渡
頭風緊去還留茱萸酒熟休惆悵好待重陽再放舟一
天秋氣碧空明山畔銜杯別動情爭奈重陽還未到愁

人風雨滿江城有句曰路迷芳草添新恨人立斜陽憶
遠情落葉村虛山露骨采蓮歌起菱爲裳

快園詩話卷十五

江寧 凌 霄 芝泉

余幼初學詩有句云障風窗紙掩層層明月今宵到未曾愛看梅花橫瘦影忍寒捲幔滅銀鐙隨園師見而賞之逢人必說余之努力學詩師獎進之也

余輯師恩友誼錄及送詩入選者漸多且得聞秀一卷遂更名快園詩話有客問於余曰詩則余旣得聞命矣敢問話之謂何余曰頌師友之厚情述往昔之遊歷紀見聞之事實無非話也至如前輩指畫法則評論臧否則余豈敢

有嘲余選刊詩集遂以賣詩爲業者以詩答之有句曰
事非汚已詩求米惠不傷人利換名

余薰仲徵君與余比鄰以美醞見贈謝之詩曰病軀難
應隔離呼多感香醪贈百壺何羨白衣餽重九新涼已
許醉饅餬

寒甚以詩投陳雲伯明府曰病中豈作醉鄉饕聊敵寒
威抵緼袍凍墨不辭頻獻句博公獎賞賜葡萄明府以
香醪大甕見贈

傅柳橋明府以大洋枕箱見贈答以詩曰客裡囊無枕
亦無頒來洋篋夢堪娛此中不敢香花置恐惹癡魂落

海隅

前人詩曰綈袍一贈猶難遇誰肯輕裘共友朋此蓋有
慨之言也余則自困後承友朋相待極厚除錢米相周
外贈春秋衣則蒲塘石葱佩刺史冒璞原別駕鄭任堂
上舍姜小琴文學陳柯山廩膳姚古鳳廩膳朱漱坪茂
才贈夏衣則東亭蘇雲巢議敘贈冬衣則蟻山江立亭
茂才吳竹亭茂才程山溪上舍江松橋上舍東亭江種
蘭茂才金詠堂廣文陳雲伯明府則闔家冬夏皆全卧
具亦備陳柳橋上舍亦贈東紬爲卧具贈器用則何涵
川明府之櫥床等物陳雲伯明府之長方各几寇坦之

守尉之椅櫬各器贈文房各玩則指不勝屈武林陳雲伯明府東臬黃楚橋太學喬雲客廣文黃佩芸明經徐生庵公子石舒薰茂才冒耕南少府蒲塘鄭耳山孝廉顧靄士公子崇川李拙齋比部王燕鎬孝廉海門沈雙溪孝廉蟪山吳竹亭茂才真州方應鞬茂才甘泉謝佩禾上舍紙墨筆硯字畫圖書不可勝計皆友情之厚也是書初名師恩友誼錄本因感友情而著故脩載於此以示永矢弗諼之意非敢自矜幸也

陳雲伯明府去後邑人歌曰三年之前民愛忡忡三年之後民樂融融去日之日末聞有公來日之日安保如

公公今去矣民獻愚衷焚香萬炷虔禱蒼穹願公再來
高控五廳被公之福一郡皆同

隨園師論詩才人之詩成句學人之詩成章然必成章
成句而後成家著集如建屋古詩梁柱也近詩褻修也
今人多用力於褻修而不計梁柱無怪集能久傳者鮮
矣

涇包慎伯孝廉世臣余卅年交也熱腸俠骨議論風生
余與論詩話因感友朋而著慎伯曰子知人有四黨乎
親族父黨也外家親母黨也內家親妻黨也朋友身黨
也惟身黨列在五倫其過於三黨明矣

隨園師言選詩之法當各就其性靈各存其面目如選戲然生丑淨旦各取其長不可責旦不能丑丑不能淨也若再限以門戶律以格調是令生旦淨丑盡演外矣舉部皆外何足觀哉

水星鼎在江南聚寶城頭康方伯基田取鐵塔廢頂鑄以禳火災者高六尺余秋農有歌不及脩載

江南殯儀用開路神多者至十三高數丈首大如甕掌大如箕相傳始於明沐英之喪有聯咏之曰爲出城門橫九畝偶凌山頂矗三霄

湘潭周石芳侍郎系英視學江蘇自書聯曰縣考難府

考難院考更難三十二年游泮水鄉試易會試易殿試
尤易一十八月點詞林

泰輿嚴太史振先有句曰忙裡人從驢背老愁邊雲送
雁行斜人從萬苦經磨琢家遇中衰看把持關山路重
妻孥累萍水人稀故舊緣

丹徒畢蕤庵之淫有句云遠水淡生烟栖禽倦啼樹樹
淺猶藏屋窗虛易惹秋露涼花氣重風細竹聲清樹深
燈弄影風定水生香離思半消新綻柳風光偏戀乍歸
人雲橫別浦人千里家隔空江夢幾宵未尋北郭新開
菊獨上東籬舊見山

熊介茲觀察爲翰林御史時多吟咏擇其警句登岱云
萬古此山先得日諸峰無雨亦生雲哭女云癡想團團
甘作鬼飽經憂患早忘官世尊也合低眉坐過客都成
掩面看送次女于歸云調瑟勉爲才子婦知書幸有外
家風別次女云失母兒尤難別父能詩人自解多情感
花翎之 賜云敢謂飛揚添意氣爭看搖曳助風神悼
忘云病慣翻教驚驟死緣深轉怕續他生

丹徒盧春航培廣有句云烟重迷歸棹雲消露夕陽水
闊天疑合雲垂樹欲傾論詩字句頻教易縱酒涓埃未
許留

江都莊載良臣有句云豈知深院竹忽作滿林秋影瘦
月移嬾香疎風動遲東風歡野鳥殘雪畫春山

癸未仲冬望懷雲伯明府曰共仰當頭月清光徹九
愛他明且潔照我直無偏不覺霜華重全教樹影圓安
能常此夕永作夜珠懸一年能幾見自歎此生休藉筆
杼情話觀書作卧遊家貧兒代僕冬冷酒爲裘憶我吳
門友寒宵定倚樓

趙幼泉明經建保甲議娓娓萬言引漢唐歷代甚詳初
頤園撫軍善之趙有句曰類合緒分諸戶口莠除禾植
此關頭

五
余生平多師無所不學未學者惟醫耳及病後神衰推步不能算棋不能着音律不能譜臂廢琴不能彈圖章不能鐫雖字畫亦不能作其他可知七年來多看醫書時與醫友談論百事俱廢而醫理稍知此補平生所未學也古云久病自知醫信然

吳才甫外翰以生豚見饋報之詩曰陋室寒壆慣肥甘味久忘拜方登惠賜澤已潤枯腸捧見兒童喜珍加鹽豉香禦冬先有恃大嚼佐壺觴

錢鎮沐月江通守特恩自都門來以燕菜見饋報之詩曰價本瀛洲貴携來況日邊頓教寒士饌改學大官筵

繭縛絲絲絮瓊雕瓣蓮食神應自笑此味不知年

趙幼泉明經頌陳雲伯明府詩并引曰洵邵伯鄉老欽
江邑陳公廉介於上游之過境者無餽遺涖任未期月
結宿案數百件鄉之積猾皆力除之間閭戴德者紅箋
署公名寫官清民安字粘壁幾遍真今之神君也敬賦
其事頌之蓬萊散秩御仙鳬歌吹聲中報政殊供帳不
聞煩海令此間頻見頌江都一天杲日堅冰解百里驚
雷老魅驅我竊有思非越畔悠悠邗水接棠湖
吳小亭兆慶荆溪石亭學政公子也候補縣佐有句云
前身修得君先到幾度曾游路未差水聲喧古石雲氣

冷秋山漁笛數聲新月上蘆花灘畔一燈紅那堪千萬
樹一併作秋聲千里依君忘作客卅年長我敢呼兄花
魂和夢冷酒味入詩清才高適自壯情重夢應多身賤
依人易愁多好夢無好景全憑驢背穩一停鞭處一奇
峯

歲杪蕭條吳才甫外翰以食物見饋報以詩曰寒厨歲
杪正荒涼多感珍肴辱寄將野鶩熟烹和麪饌無蔬無
栗兩俱忘

東蜀費昆來幕府廷瑛由江南攜瓢兒菜見贈報以詩
曰江南風物久稀嘗欲覓江船買一筐多感勞君攜見

贈最宜人處是家鄉

包慎伯孝廉以風雞等物見饋報以詩曰歲歲賢侯饋

五辛

謂雲伯明府

而今依舊甌生塵雪天有憶袁安者雞黍

情深是故人

余八口僑居七年卧病終年無一絲一粟之入悉仗各
賢友相濟以生癸未冬陳雲伯明府旋里王簣山觀察
署臬篆熊介茲觀察游楚惟賴汪劍潭資政吳才甫外
翰冠坦之守尉許春卿廩膳曙開上人而已漸逼歲除
萬不敷度高吟自遣且姑聽之乃蒙吳才甫外翰調護
之外珍惠頻加又承阮梅叔明經包慎伯孝廉陳鵬堂

茂才馬素園奉政陳艾村上舍李琴軒茂才趙幼泉明
經趙彬仙廩膳朱槐庭文學李冠三比部周在東茂才
懋懋上人競義相周竟以度歲幸哉載諸梨棗以示銘
刻

余十六歲十月初一日遘中風疾卧床不起是歲大饑
大母捐貲二十餘萬以賑養親族數十家凡施棺救火
諸事無不力行余病霍然若失至四十七歲正月二十
二日復病中間三十年無恙生子二女六皆成人今病
困七年尚未轉於溝壑非蒼蒼者默使善人相護佑耶
時有議天道難測者余故書是條以證之今天之所以

病余者三十年已厚余矣

快園詩話卷十六

江寧 凌霄 芝泉

錢塘程掌綸鳳池工書善奕課次子志珏三年取余集
概及快園詩牘摘句書扇頭今記所摘句莫愁湖中山
王樓見新月曰知否此間看最稱將軍弓勢美人眉銅
井道中曰霜重草鋪平地白霧低山露半峯明人貪徑
捷穿田走驢喜沙鬆近水行鳥夢曰一樣春宵分冷暖
鴛鴦酣睡杜鵑醒過單椒山房曰十日不來秋意老
花遮徑比人長秋海棠曰卿與桃花同薄命桃花還得
近東風觀馬曰空羣當此度展足看他年老吏曰宦海

慣經波浪險。訟庭羣服斷。才高頻婆果。曰色香都蘊藉。
風味不酸寒。橘綠三分借。桃紅半面看。香櫟曰天寒黃。
漸老霜重皺。難揩漬蜜同。柑味留香共。橘懷美人對。鏡
曰自知已絕色。猶妒鏡中人。泊皖江曰江聲千尺岸。月
色五更潮。晴川閣曰翡翠衰成春草地。臙脂浸出夕陽
江。飛來峯下待月曰轉怪靈峯飛不去。礙他涼影上塔
遲看柳絮曰風不送涼。偏送暖。春棉鋪上酒人衣。送梁
德圃曰亂山他日夢。短燭此時心。再赴袁江曰雄心漸
短如燒燭。出路無常等奕棋。客路遇張還遇角。家園呼
癸復呼庚。送朱觀察出關咏燕曰分道雁羣仍出塞。同

枝鶯侶半遷喬女涓圖曰未持箕帚先持檝從此郎情
水樣深蕃釐觀曰多情璧月還窺影如夢瓊花久斷春
花朝曰牡丹富貴梅寒瘦何事都教並日生夜發曰月
高人影小布近犬聲多南庄曰隔村歸去日云暮一路
夕陽人影長登天闕山曰山腰雲嬾和僧宿木末風腥
認虎來采石道中曰樹靜風不生一縷窯烟直喜指賣
茶家山腰一棚小題項王曰緣何蓋世英雄氣僅抱還
鄉富貴心面目尚知羞父老頭顱不惜贈將軍青溪泛
舟曰侵人風露宜人月涼透羅衣第二層軍中紀事曰
白雲倦馬朝傳檄黑月移營夜裏糧泊舟湖口曰星明

東坡先生集卷之六
七
球口寒吹角月暗潮頭夜打城雨花臺馬湘蘭墓曰值
得此間銷艷骨香泥多半是天花偕友遊湖曰風減半
林葉霜清一澗泉誰爲天下士臣是酒中仙畫石曰未
經卞曰空懷璞儻入媧鑪定補天礪齒不妨容我漱問
心可得比君堅鳳凰山曰擲笛樓頭無鶴馭吟詩江上
有龍聽送出關曰九邊草色三秋斷一派河聲萬馬來
怪石劈開皆試劍大風陡起欲飛人自題快園曰淵明
松菊荒三徑仲蔚蓬蒿長一園愁似潮來真有信夢如
雲去本無心題甦香記曰煩君多鍊媧皇石補盡人間
離恨天舟中書懷曰亂山回首夢無數寒雨到船鐘幾

聲瓦硯曰祇恐磨穿終有日墨痕轉比雪痕深出惠山
曰山靈也恐人歸去放出閒雲礙馬頭西樓曰檐攸夕
陽紅一角窗虛春樹綠三方美人鐙曰徵歌合奏陽春
曲擇里還居不夜城芳年月姊剛三五仙籍夫人本上
元薄命盈盈原似紙相思寸寸易成灰鬟雲髻霧看常
繞意蕊心花喜便開宜傍素娥居月窟好同織女度星
橋多縈愁緒何難剪暗動春心不禁挑玉偶配來乘蠟
鳳弓鞋移處撒金蓮珠藏何日方成孕丹鍊前身已駐
顏鬥草定當邀火伴采芝應許上鰲山我擬贈珠無火
齊卿如留佩有明璫振觸風情多冷落聰明心竅本玲

瓏病起曰新病起人如鶴瘦舊遊過地有花紅送春曰
紫陌曾聞來有脚青年最苦別無家傷心懷夢惟餘草
滿眼將離莫問花奢念妄思三月閨癡心空替百花愁
濁酒無情聊爾餞餘花雖艷爲誰容集桃花庵曰修竹
碧於水孤僧閒似雲登山曰樹影小於薺炊烟高似雲
青蓮寺畫蘭曰西風吹冷三升墨也學蓮花朵朵青曉
日紫氣東來滿羲和已着鞭雲霞初出海環珮正朝天
淮陰一飯圖曰扁舟羞向祠前過一飯平生受已多學
得英雄前半世年年乞食向風塵偶占曰客心酸苦人
情淡轉覺年來海味甘七夕曰飄零愁惹神仙笑不敢

當堦曬破禪不如守拙江村裏女織男耕過一生登高
曰老衲瘦於菊遊人多似鴻留別曰千言萬語寄遙箋
不及多留一見緣歡會縱能如此日光陰容易過中年
新柳曰誰開青眼逢佳日自取黃金鑄少年輕暖輕寒
春作態多愁多緒爾何癡寒食曰不是禁烟烟也禁寒
壅風味本來多旅次曰杲之腸習惟三韭高賀盤餐只
一肴囊裏蚨俱隨母去書中蠹本化仙難百不能堪惟
酒遣一無所就以詩名江湖杜老雙蓬鬢天地劉伶一
草廬未成畫稿曰既能珍駿骨豈在補龍睛秋獵曰氣
爽馬隨人共壯風高鷹與鷺齊飛天將素月懸弓勢地

有青霜助劍威秋笳日十八拍中人出塞二三更後客
思家題家貧夢買書圖曰有錢不買奇書讀纔筭癡人
在夢中題幽夢乞詩圖曰新詩待唱秋墳鬼往事爭談
春夢婆崇川雅集曰鳩婦喚來榆莢雨鼠姑偷度棟花
風人似餘春多暖意客如明月有圓時五代殘碑姚鎮
過一杯乾土駱賓王詩禪未許逃蘇晉酒戒偏教破邴
原心盟江海同流水目飽淮揚未有山落花曰吟紅誰
復尋三上惜翠人皆繫五中夢儻能開惟筆在喜如可
卜有鐙挑南庄曰苔砌泥融喧蚓笛茅檐風定聚蚊雷
采石曰沙田足雨禾抽穗澗水侵堤柳露根石床洞曰

小憩就石床古苔涼到骨桃源洞曰雞犬聲不聞頭陀
枕經睡懸崖曰秋氣欲生天半黑大鵬展翼撲人來古
墓曰草深春不到冷放野棠花寄洪太史曰聽到琵琶
心易醉臙脂山下女兒多送秦中丞曰策馬請君揮手
去而今關外有桃花他日賜環誇眼界中原以外看山
來魯肅墓曰一郡曾關支鼎重千秋空憶指囷賢謝祠
檜曰遺愛不殊丞相柏受恩曾比大夫松金山曰鼉聲
未息夫人怒馬鬣猶存術士封自笑曰酒肉朝朝富貴
家齊人昔日而今我贈汪玉屏曰淮海十年鷗聚散雲
天萬里雁東西贈袁玉堂曰自遇袁絲甘作弟得從東

野願爲雲忠愍祠曰攘臂登陴無守禦傷心犯闕有干戈
答熊女史曰人似謝家風裏絮錢如天女手中花題
上人畫蘭曰色相無形香有迹愛他空谷似空門自題
何陋軒曰太貧遭賊笑久病覺醫慵家貧兒代僕冬冷
酒爲裘和張學政曰病喜賓忘禮貧勞友具餐月當頭
夜懷陳雲伯曰愛他明且潔照我直無偏口占曰病遑
他願求妻健貧乏師資任子愚卽目曰不自輕鬆蝸戴
屋爲誰辛苦鵲營巢得權奴似當門犬失路人如伏卵
雞雄心漸短如磨墨好事難成比鍊丹自遣曰得酒每
思佳客至有花且當美人看口占曰殘月尚如新月式

今年又改去年觀嬾從負局求盧雉悔鸞遺書誤犬豚
異地幸能依骨肉虛名羞說動公卿有懷曰好友夢馳
千里路佳人思過一春期哭友曰百身難贖秦淮海千
里誰爲范巨卿奕棋曰變換萬端皆有劫經營一着要
爭先新歲日事過方知天意厚齒增轉惹客心驚有感
曰冰清雪白終成水桂馥蘭芳尚任風夢回曰夢回酒
醒窗全白知是晨光是月光贈友曰生如無愧何妨困
名到能傳豈盡詩荅友曰花到十分春不久人無百歲
慮偏深自慨曰五窮未脩交猶廣萬恨難消德未酬慚
非駿馬偏逢售累徧豬肝豈自安鼠腹飲惟容一勺鰲

頭重已戴三山

甲申春汪月樵巖尹新年由餘東來揚卽承惠眷以上
元雨詩東余曰雨聲點滴亂如麻漸短春宵轉覺賒人
意不能忘月魄天心應是爲梅花新愁舊恨惟孤枕樺
燭紅鑪想萬家兒女淒涼鐙一粟饑餬夢去海之涯余
和云擬吟鐙月寫箋麻助興呼童酒又賒節好偏逢連
夜雨春寒應勒及時花久拋蓑笠眠孤榻遙聽笙歌隔
幾家最切懷人江水外風嚴休阻夢天涯

明府
吳門

謂懷王寶山
廉訪陳雲伯

上元雨袁真來別駕以肴見饋答以詩曰佳節逢陰月

不明街頭稀聽賣鐙聲得君珍饌遙相饋佐酒堪娛客
裏情

壬午癸未皆承陳雲伯明府見周以度明府回籍甲申
春余家復空余賦詩曰鎮日蕭條釜不開杜門高臥徑
封苔癡兒囁語真堪哂夢說賢侯送米來適明府來揚
忽遣數人肩白粲見贈明府未見余詩也明府德之厚
余詩之巧讖若此

陳雲伯明府以海珍各品見饋兒童歡甚余紀以詩曰
貧家得見海珍難無怪兒童別樣歡最是鮮鯉尤平致
視同仙餚各爭餐

俞薰仲徵君以豚酒見饋荅之以詩曰索居春社正無
聊多謝鄰翁慰寂寥妙展陳平分肉手讓農大嚼醉終
宵

僧憨憨有句云被累始逃禪爲僧又加債安得避紅塵
更有空門外

粵東張雲巢都轉青選謙和恤士風雅愛才時承過訪
值程掌綸在座程題余陋室曰往來談笑總佳賓小室
三楹氣盡春羸得鄉鄰爭艷羨上公飛蓋訪詩人

繆子嘉徵君玉成赴都過揚惠眷交至余送之詩曰五
年重晤喜還驚不負相期素日情此去都門多得意好

爲霖雨濟蒼生

黃春谷大令承吉以綵箋二百幅見饋答以詩曰頒來

最愛綵箋新前有康成

鄭任堂上舍

後有陳

雲伯明府

更謝解元

黃大令多情遙贈放吟人

方應韶茂才震以佳墨數十丸見饋答以詩曰脫手豹

囊贈文章頓有光三升揮灑足點滴勝瓊漿

程掌綸贈余四詩之一曰天遣名賢爲解推陳侯

陳公雲伯

甫去列公來運司

張公雲巢

德厚能周急觀察

王公簣山熊公夢庵情

多最愛才太守

江公劍潭

明經

阮公梅叔

長庇護通儒

許公春卿陳公穆堂

馬公素園外翰

吳公才甫

慣栽培佛心更有蓮臺客

曙開上人時

現慈雲法界開

王簣山觀察甫署臬篆回任卽使數人肩粟炭見贈不忘高臥有袁安也余感而紀以詩曰濟人恩德重於山白粲烏銀次第頒前有賢侯後廉訪寒儒安得不歡顏曙開上人性恬號碧溪五月十三日誕余祝句云壽域漸開蓮世界高人宜並竹生辰是日竹生日也

甲申夏米珠薪桂承周助者王簣山廉訪張雲巢都轉熊夢庵觀察吳才甫外翰汪劍潭資政汪月樵鹺尹馬素園奉政碧溪上人阮梅叔明經包慎伯孝廉李冠三比部朱槐庭文學姚問田上舍王春江副車余五日卽

景曰共濟蟾蜍餒爭填墨滿胸今朝仍畫虎幾載負登
龍綵縷命思續蘭湯香幸濃調成鸚鵡舌喜有賞音逢
蓋誌感也

陳穆堂茂才以楚辭急就章漢樂府唐協律鉤元等書
見贈皆其尊人素村先生所箋注也考覈精詳洵爲善
本余愛而寶之故余消夏詩曰把書手倦每輕拋一枕
羲皇自息勞學得清狂名士態終朝痛飲讀離騷

陳耀旗如赫江都諸生柳橋之祖也端方孝友慷慨重
義其雁字云蕭索南天雁陣橫關山勞越惜平生莫疑
漫運春秋筆畫出人間好弟兄其自遣云客至常餘酒

多愁懶近花風塵驢背老江帶夕陽斜

仁和錢次軒學政拭主梅花書院文望尊隆謙和風雅
甲申夏長子志鈺往謁真州伍松文大令愆期未歸余
閉門困待承公惠顧余以詩謝之有句云隨時能布春
風暖合爲梅花作主人

蕭韞山琪江都諸生性謙和重然諾最愛其七夕詞中
句云人生修得如牛女已較參商是福星

陳柳橋一號坦卿江都諸生質樸謹信其春柳云雨晴
憐過烏風到暖吹人草云摧殘野火愁添夢感到東風
憶舊恩